

A considera cambio na bienestar di enseñansa

Norma adapta pa alumnonan di Mavo drenta Colegio

ORANJESTAD - Despues di un aña di suspension, Colegio Arubano ta alustá e exigencianan cu cual e alumnonan di Mavo mester cumpli cu nan pa haya acceso na e di cuater aña di Havo.

Un promedio di 7.5 pa e materianan di perfil tabata e nucleo pa di e norma nobo ey. Sinembargo muchanan cu 6 promedio pa Hulandes y Ingles cu minimo di 29 punto

pa profielvakken tambe ta bin na remarca pa admision.

E norma nobo aki a trece hopi discusion den prensa y parlamento y tambe e scolnan pa Mavo a duna di conoce cu nan no tabata contento cu e exigencianan nobo aki. A crea un situacion entre Colegio y minister y entre e scolnan mes, unda pa hopi tempo no tabata comunica mas substancialmente. Un situacion cu ta dañino pa enseñansa

Arubano y cu esaki tambe pa e alumno Arubano. E alumnonan di Mavo tambe a reacciona na manera asertivo riba e exigencianan di admision den prensa y riba Facebook. Nan a mostra riba e hecho cu den cierto casonan e normanan nobo di admision ta irasonabel.

E alumnonan cu lista di cifra excelente no ta keda admiti pa motibo cu Colegio Arubano ta pone énfasis riba

e materianan di perfil (profielvakken).

Den un carta manda na e scolnan Mavo, Colegio Arubano a duna di conoce cu kier tuma un paso pa yega na e alumnonan di Mavo. E alumnonan cu un lista di cifra cu minimo 6 pa Ingles y Hulandes y minimo 29 punto pa e cuater materianan di perfil hunto, por bin na remarca pa admision. Nan mester raporta nan mes na Colegio Arubano, unda e comision

di admision lo evalua esaki a base di e lista y e aviso di e scol Mavo di cual e alumno ta procedente. Colegio lo haci un solicitud na minister pa duna e alumnonan aki guia extra durante e prome aña aki.

Cu e paso aki, e scol ta spera cu un situacion ta surgi den cual por dialoga na un manera substancial, tocante e desayonnan den enseñansa Arubano, cu e scolnan y minister.

